

摘藻堂四庫全書薈要

集部

欽定四庫全書薈要

集部

傳家集卷六  
七



詳校官助教臣常循

欽定四庫全書蒼薈要卷一萬四千六百十四

集部

傅家集卷六

宋 司馬光 撰

律詩一

御製後苑賞花釣魚奉聖旨次韻

駸駸蜚廉次第開鳴鞘傳蹕自天來雲隨綵仗低臨幄  
柳壓金隄翠入杯檻倚柔風絲縹渺花鬪麗日影徘徊  
上林春色長如舊玉輦嬉遊歲歲陪

奉和御製龍圖等閣觀三聖御書

嘉祐七年十  
二月二十七

上日

積厚丕丕業重光郁郁文寶書垂列宿玉宇切浮雲散  
帙鳴鑿駐充庭雜珮分願移天縱藝似續聖功勤

資善堂宴餞應詔

士論歸清德皇心重老成陳謨侍經席得謝解塵纓坐  
密金章並行徐玉醴清都門昔供帳疎傳未為榮

賞花釣魚二首

飛廉通上苑鳩帶天淵樹色含春霧波光靜曉煙香

飄仙仗外花舞御卮前籊籊文竿裊篔篔素鮪鮮誤陪  
金馬籍愧奉栢梁篇願獻南山壽宸遊侍億年

日麗芙蓉闕春濃太液波苑門鳴玉集輦路翠華過芳  
樹周阿密嘉魚在渚多浮英入樽筓頌首出蒲荷人樂  
熙熙德臣賡旦旦歌萬生同鼓舞相與醉天和

邇英閣讀畢後漢書蒙恩賜御筵

赤伏開興運昆陽定壯圖官儀還舊物郊兆建新都杲  
日羣陰破油雲萬類蘇鑾輿陟喬嶽璽綬撫匈奴厚祿

優諸將嘉猷訪大儒重明紹堂構奕葉奉規摹叔世  
條綱紊遺風節義扶袁安空隕涕楊震卒蒙辜佞指車  
前鹿人瞻屋上烏炎精盡河渚黃青兆當塗青簡傳良  
直金華侍燕娛興衰炳轍跡淑慝祭龜符赫赫天光照  
孳孳睿思紆方齊建武治不啻永平俱化盛文明正恩  
隆飲食需晞陽慙杞棘濡味愧鷓鴣帝力生成大臣功  
報效無先民誠可監願不忘斯須

奉和江鄰幾文德殿觀文武百官等上尊號十

五韻 六月七日

舜禹曾何與羲農實強名含靈徒叶贊造物始無情閭  
闔非煙澹觚稜曉氣清歲蕤大衢隘殷鑠外朝盈鮮旭  
分衣繪薰風拂佩瓊華顛方內集殊俗海隅傾祭戟金  
闈奧囊書赭案橫敷言齊列位稽首從羣卿不報乾坤  
施難圖日月明仁心由性得治體與時行金石皆中款  
丹青豈外榮功歸元首重澤及草茅輕業業冲虛意區  
區愛戴誠何為猶讓德不以慰懷生退復歌天保期於

采頌聲

和宋次道大慶殿上元迎駕

鳳律年華到尚新  
九重氣象已成春  
曉雲低拂羽林仗  
宿雨先清紫陌塵  
玉殿鳴鞘傳警蹕  
彤庭委珮集簪紳  
闕前無復魚龍戲  
自有驩謠億萬人

寒食御筵口號二首

雨意沉沉潑火餘  
夔龍盛集退朝初  
酒榼絡繹來丹禁  
冠劍參差下玉除  
紫鳳歸飛雲爛漫  
黃鸝新轉柳扶疎



麥禾滿野邊烽息佳節何妨賦樂胥

聖主褒優鼎軸臣金觴玉醴照青春萬家煙火朝來靜  
九陌風光雨後新高鶯翻飛驚紫綬餘花點綴託朱輪  
問牛因得觀民俗不獨嬉遊惜令辰

春祠致齋寄呈范景仁宋次道

比日聚官舍笑言曾未厭暫成揮手別各有侍祠嚴晴  
景朝朝麗春容物物添解齋當共醉莫遣此期淹

和王道粹春寒趨館馬上口占

全宋詩卷之六  
卷六  
殘臘尚要春清寒更著人雪華猶惜別物意倍添新雲  
壓宮城重風調玉漏勻行遊宜結轡九陌未多塵

同宋次道元日宿尚書省聽戒誓寄常州邵不

疑去年是日次道  
同不疑齋直

椒花獻歲新瑄玉侍祠頻此夕同華省非才愧後塵江  
風迎茜旆沙雨待朱輪不比齋宮冷端居棄擲春

正月三日與廣淵同出南薰門分趨齋宮塗中

成

並轡出都門  
葱龍日欲昕  
野寒餘宿雪  
樹閣濕春雲  
稍望郊宮近  
先愁馬首分  
一朝猶戀戀  
可復久離羣

二月二日太常致齋晨起呈范景仁宋次道二

同舍

官舍春蕭瑟  
朝來尚薄寒  
人雖繁陌上  
塵不近門端  
已

負踏青約

同舍先有是約

仍無舉白歡

從次道求酒不獲故云

憑君御溝

上試折柳條看

和王道粹垂拱早朝王范二直閣班列在前戲

成小詩

霽日扶霜仗祥煙覆曉班帝居回北斗天闕竦南山紫  
殿鴻鸞肅金門虎豹環蓬萊兩仙伯迥立白雲間

和宋子才郎中孟秋省直

夜久殘暑盡好風來滿襟牀空唯置枕冠小不施簪竹  
影亂涼月林梢轉曉參人心有喧寂何必卧雲岑

八月五日夜省直

大火已西落溫風猶襲人留連惜紈扇散誕脫紗巾蟾

影夜色淺蛩聲秋意新圖書足自適何物更關身

八月七日夜省直苦雨三首

夜色槐陰重雨聲官舍寒野農安敢問環堵未能完  
盡日流雲度何時大塊乾正愁開霽晚霜霧滿紅欄

悵望中秋月於今已上弦明生圭樣小影露桂華偏幽  
思邈難致浮雲去不還何當出陰翳清徹照中天

菊蕊如排粟青青見葉心未嘗窺白日何以散黃金  
歌測踈籬短綿延蔓草深寒蛩爾何與終夕亦悲吟

次韻和江鄰幾九月五日省直

羣騶布路散瘦馬解鞵迴雨闌蟲聲樂秋深菊意催  
圖書紛自適僚友邈誰陪何以消寒夜殘醪不滿杯

和宋次道奉慈齋宮見寄

去住邈如霄與塵依依欲別更相親雖知洛邑饒英俊  
莫忘齋廬並直人

次韻和王勝之十二月十五日朝退馬上作

瓦溝微白雪光清闕角初紅海日騰塵息長街千騎入

鞘鳴深殿六龍昇雲巖有客空回首圭華何人尚曲肱  
自笑鯁生章綬縛不容逃去正如罾

又和雪

四簷冰管未全晞一夕陰風雪又飛客卧牛衣憂死別  
人留玉塞望生歸公車歲晚憐東郭遼海雲深失令威  
頗憶當年映書否物華如舊鬢毛非

和王道粹雪夜直宿

天祿凝嚴近紫臺書幃夜對雪華開層樓直倚寒空出

清漏還從深殿來，薄夢不成冰柱折。曉光先到玉花催，  
兔園終是諸侯事。虛費相如能賦才。

館宿遇雨懷諸同舍

佳雨濯煩暑，翛然生曉涼。森沉殿瓦碧，幕厯井苔蒼。  
院靜杉篁秀，人閑鐘鼓長。憑誰同把酒，清興官相望。

寒食南宮夜飲

積旬留省署，容易度春華。芳草踏青晚，長楸行樂賒。  
雲疎時送雨，風細暗飛花。直有黃金百，無因過酒家。



和范景仁夜讀試卷

案前官燭墮花頻滿目高文妙入神勇氣先登勢無敵  
巧心後發語尤新好賢何啻三薰貴求寶方知百汰真  
愚魯自非憑驥髮崑山千里到無因

代叔禮作使北詩

人主愛民物心無彼此情約歡同一國蒙福徧羣生玉  
帛遙相望風波寂不驚熙熙南北海所至盡升平

又擊毬

肅奉乘軺命仍陪戲馬遊朋分初迥出勢合復相收顧  
盼華星激縈回紫電流良因重嘉好禮接使臣優

同宋次道陪讌瓊林

冠蓋連翩數里塵帝家全借上林春鷓行不動煙霞秀  
龍角正高雷雨新喜氣晴曛宮樹綠飛花醉墮玉卮頻

蒲萄盧橘應相識半是當年舉酒人

是日在席  
同年七人

寄題興州晁都官

仲約

東沼沼上有唐鄭都官

詩刻石

名郎遊勝地，心跡繼風流。昔為題詩著，今因好事修。四山相照映，五馬屢淹留。想見波光淨，依然一片秋。

鄭詩云微

底千峯影無風一片秋

### 和趙子輿龍州吏隱堂

四望逶迤萬疊山，微通雲棧落塵寰。誰知吏道自可隱，未必仙家有此閑。酒熟何人能共醉，詩成無事復相關。浮生適意即為樂，安用腰金鬲鵝間。

### 寄題錢君倚明州重修衆樂亭

公輔

橫橋通廢島華宇出荒榛風日逢知己湖山得主人使  
君如獨樂衆庶必深顰何以知家給笙歌滿水濱

題楊中正供奉洗心堂

崇勲之孫

閔閔盛山西朱門颺戟衣雅知名教樂深笑宴遊非一  
室琴書隘三年園圃稀異時論事業肯復讓輕肥

寄題李舍人

偉

蒲中新齋

隴上家聲勇氣殊邊庭卧鼓欲安居非同王翦私求宅  
更似甘寧晚好書劔倚寒窻風漸漉門無雜客柳蕭疎

蒲州風土平生愛為問旁鄰地有餘

寄題常州東山亭二首

謝傳英聲高可攀結茅積土想東山常憂勝槩一朝盡  
豈信風流千古還塵尾蒲葵供永日酒樽碁局奉歡顏  
賢侯心迹遙相望不使蘭陵風月閑

閱閱崔嵬動四方入門鸞鶴自成行青綈舊已臨佳郡  
墨客新歸耀故鄉醉舞幾應摧屐齒對碁正欲賭香囊  
階庭玉樹寒相照更使東山逸氣長

王金吾北園

丞相後園天籟鄰年年分借上林春  
目前但識禽魚樂門外何妨車馬塵  
花蘊祇疑名品盡圖書方驗古今貧  
將軍朝下無餘事端為風煙作主人

寄題傅欽之濟源別業

縣郭遙相望脩篁百畝餘林間清濟水  
門外太行車道勝隨宜足身閑與世疎  
何時容命駕采蕨釣肥魚

遊李衛公平泉莊

相國已何在空山餘故林  
鼎時堪炙手今日但傷心  
陵谷尚未改門闌不可尋  
誰知荆棘地鶴蓋舊成陰

寄題李水部庠滙水別業

茅茨臨素滙沃野帶長林  
日永一堂靜草生三逕深  
消憂何用酒為樂不須琴  
擾擾市朝客無人知此心

寄題濟源李少卿章園亭

縣僻人事少土肥風物殊  
杖刊靈壽木輪裹溴梁蒲  
竹不減淇水花仍似洛都  
主公眉雪白遊覽未嘗扶

寄題宇文中允之邵所居

孤宦行直道栖栖良可悲誰能拂衣去不待掛冠期  
經史乃吾友雲山為已知世間青紫貴盡付兩佳兒

戲書宋子才止足堂

舉世戀榮祿夜行無乃勞獨君年未至止足一何高  
矮製烏紗帽寬裁白氎袍華裋坐終日閑按紫檀槽

寄題張著作

中理

善頌堂

嘉州公裕  
學士之父

玉壘老先生逍遙樂太平門闌百客盛冠蓋一鄉榮國



族招邀近堂皇指顧成江山對平遠圖史散縱橫止水  
中心適秋毫外物輕鯉庭新露冕閭巷不須驚

寄題刁景純葺春塢

景純致政歸京口治其所居命曰葺春塢前有一崗

皆松林命

曰萬松嶺

歲春在何許鬱鬱萬松林永日門闌靜東風花木深主  
公今素髮野服遂初心時與鄉人醉高歌散百金

遊瀍上劉氏園

日暖孤臺迥露濃幽迳微茅齋舉白飲沙渚踏青歸照

水清滿眼穿林香濕衣莫言春尚淺已有杏花飛

題致仕李太傅園亭

漢家飛將種氣槩耿清秋解去金貂貴來從洛社遊清  
商擁高宴華館帶長流可笑班超老崎嶇萬里侯

太行

象帝胚渾散愚公轍跡開橫行四極外蟠據九河隈第  
鬱天關近崢嶸地軸回陽崖明草樹陰壑轉風雷波沓  
羣峰涌雲奔峭壁來猿嵒垂磊落龍窟鬪喧厖噴雨驚

湍灑跳星巨石頽平塗憂履折跬步戒輪摧覆頂千春  
雪緣潭萬古苔谷盤容國士髓裂餌仙才晉市飛樵札  
燕郊落燒煤碁圖分冀野蟻壤認叢臺在昔王塗塞嘗  
聞霸略恢巖關陰伏甲間道夜銜枚挾詐揮金斗貪功  
襲墨綰戰場空爍火京觀悉蒿萊險易曾何變興亡只  
可哀隆平方恃德襟帶自崔嵬

漁父

楚岸橘花香扁舟泛渺茫短蓑衝密雨素髮淨秋霜煙

外鳴榔遠波間擲線長無人識名姓擊楫入滄浪

早春

璿霄轉斗車春意逼梅花熟寐侵街鼓閑情到酒家晴  
陽浮地末寒色斂天涯歸鴈空餘迹朝來印浦沙

山中早春

山木欣欣意春光次第催歌巾望歸鴈伏檻聽新雷巖  
靜聞冰折巢空喜鷺來澗花從寂寞亦向草堂開

贈學仙者

微逕透重巒茅堂竹葉冠方瞳映骨靜秀氣逼人寒夜  
火裝丹竈晴霜醮石壇不須驚淺俗輕舉入雲端

入塞

萬騎入榆關皋蘭苦戰還摧鋒佩刀缺蹋血馬蹄殷鏖  
吹來風外牛羊出霧間須知沙塞惡壯士變衰顏

田家

未塞豪人奪何言公賦收皇心雖惻隱蓬戶或焦愁為  
吏空多祿無人能此憂知君坐公府佗日富民侯

和人葦花

葦莢迷河曲高秋一番榮  
齊紈張野白楚練照川明  
不夜月長皎踰時雪未晴  
萬仙霓帔合千畝玉苗生  
漠漠波瀾偃茫茫沙磧平  
際空鹽海竭垂地塞雲橫  
日暖鷗無色風高鶴有聲  
逢君得嘲賦豈愧東新并

華清宮

新豐鷄犬稀  
薊北馬秋肥  
金殿翠華去  
玉階紅葉飛  
荒林上路廢  
溫谷舊流微  
嗟此非人事  
何須問是非

虎牢關

天險限西東，難知造化功。  
路邀三晉會，勢壓兩河雄。  
餘雪霑枯草，驚飈卷斷蓬。  
徒觀爭戰處，今古索然空。

梧桐

紫極宮庭閣，扶疎四五栽。  
初聞一葉落，知是九秋來。  
實滿風前地，根添雨後苔。  
羣仙儻來會，靈鳳必徘徊。

秋日登觀信亭

西風連夜雨，草樹已蕭條。  
宿靄稍零落，寒山更寂寥。  
林

紅猶帶日岸白欲生潮新鴈來何處離離天際遙

湖上村家

萬頃寒煙外茅茨枕碧流楓林巢乳鶴沙渚亂鳴鷗  
漠菰蒲晚蒼蒼蘆荻秋欲過南浦去籬下出漁舟

雙竹

草木類同而種殊者竹為多杭州廣巖寺有雙竹相比  
而生舉林皆然其尤異者生枯樹腹中自其頂出森然  
駢竦樹如龍蛇相縈矯首矜然予見而賦之



雙榦標枯腹青青凡幾霜龍騰雙角直鯨噴兩鬚長詎  
欲尋支遁安能問辟疆屢來非別意未與此君忘

南湖二首

宋都南野水花柳媚名園鳥起沙留迹魚驚浪結痕朱  
橋通別島白路出荒村城邑雖云邇常無車馬喧  
海鴈長橋北乘閑日日來遊魚自應樂宿鳥不相猜弱  
柳週遭合芳花次第開梁王昔遊集後乘列鄒枚

西谿公讌二首

五馬非從樂  
西城念勸功  
翠帷低映水  
紅旆不勝風  
葉脫青山靜  
雲歸碧落空  
淹留盡佳興  
新月漸朦朧  
謝守愛山水  
軍城況不賒  
魚驚避落葉  
鳥倦立浮查  
古柏依岡遠  
垂楊帶岸斜  
秋風吹急管  
一曲度荷花

西湖

佳麗三吳國  
湖光蕩日華  
魚驚動蘋葉  
鷺喜掠楊花  
雲過山腰黑  
風驅雨脚斜  
煙波遙盡處  
髣髴見漁家

夏日西齋書事

榴花映葉未全開  
槐影沈沈雨勢來  
小院地偏人不到  
滿庭鳥迹印蒼苔

過故洛陽城 二首

四合連山繚繞青  
三川滉漾素波明  
春風不識興亡意  
草色年年滿故城

煙愁雨嘯奈華生  
宮闕簷簷舊帝京  
若問古今興廢事  
請君只看洛陽城

初春登興國寺塔

雨過風清露氣勻，林花變色柳條新。  
為君作意登高處，試望皇州表裏春。

和李殿丞倉中對菊 三首

高士寄朝市，迥然心迹殊。  
秋風太倉裏，黃菊滿庭隅。  
陶令成詩後，王公送酒無。  
遙知厭俗事，未免強躊躇。

文案漸消散，倉閑吏已稀。  
庭空數蝶下，夜靜一螢飛。  
愛賞忽成句，淹留時忘歸。  
高情雖不繫，遇此獨依依。

涼風正蕭瑟，好月復徘徊。  
幽興眇不盡，芳樽時一開。  
餘

英葢紅葉墜露濕蒼苔從此東籬下應忘歸去來

執酒

執酒勸君君盡之今朝取醉不當疑好風好景心無事  
閑利閑名何足知

河橋春別

河橋春盡送君歸又惜無歡度此時亂花滿眼遮人望  
不見行塵空酒旗

答陳進士謂之憶江東舊遊見贈

客路今東去亭臯木葉飛居然不堪恨况與賞心違顧  
渚煙波濶長洲草樹微江邊好春色行望錦標歸

又贈謂之

文藻兼名理三吳第一賢鄉心幾千里飛雁滿秋天  
籬下多新菊淵明歸思長主人方愛客未得傲羲皇  
君念東歸日應須書繡榮當令故闕吏還識棄繻生

重九日憶菊

節物都何晚佳辰容易過黃花不足念當奈酒盃何

客思

客思倦漂泊居然感物華  
關頭望紅葉馬上見黃花  
薄宦終無定閑愁詎有涯  
今朝書至否幾夕夢還家

前年春與楚正叔同遊陟岵寺  
今茲已復周歲  
窅然思之

陟岵寺南山曾陪半日閑  
春來夢携手宛在白雲間

曉霽

夢覺繁聲絕林光透隙來  
開門驚鳥鳥餘滴墮蒼苔

觀江上人壁許道寧畫寒林

昔曾驅瘦馬衝雪過棗陽不悟當時景蕭然在此堂  
自都往餘杭懷聶之美

閣上新文卷欲逢知己開相思不能已歎枕夢君來  
夢與之美為寒食遊

寒食無佳賞芳菲半已空夜來逢勝友未至負東風  
別聶之美

客宦常漂泊離懷徒自勞貧無衣換酒空有涕霑袍木



葉寒猶在江湖暮更豪行舟遠不見賴有片帆高

松江

吳山黯黯江水清欲雨未雨傷交情扁舟蕩漾泊河處  
紅蓼白蘋相映生

秋風索索連江起暮過煙波十餘里長蘆瘦竹映漁家  
燈火渺茫寒照水

潮水 二首

平江欲上潮古木自蕭蕭兩岸饒葭葦寒波浸寂寥

淋淋出海門百里雪花噴坐看東歸去平沙空有痕

旅宿睢陽南湖

梁王棄宮館時世古今違猶有南湖水春來鴈鶩飛樓  
臺沉倒影林薄挂餘暉豪侈終何在行人得暫依

聞龔伯建下第

文章真長物堪歎又遺賢利器空埋土靈光久照天趙  
錐猶未出荆壁會須傳道在雖窮困知君不慨然

題陳秀才鳳園林

劇談驚滿座音貌獨琅然可惜鄴生老誰知蘇季賢青  
囊世外藥碧幕醉中天不佩黃金印都緣負郭田

九日登麻蘭坂

客路逢佳節無歡更益愁前山造雲日登陟不因遊

遊延安宿馬太博東館

字承之

高館寂無譁安閒勝在家暮煙凝塞上堠火落天涯坐  
久筆生凍夜闌燈作花主人意未盡歸路不為賒

送何濟川為龐公使慶陽席上探得冬字

涉

幕府遙三舍傳車乘一封忠深輕遠道醉暖失嚴冬  
水猶飛檄蘆關未滅烽賢侯雖喜士難得久從容

延安道中作

羈旅兼邊思川原蹠血新煙雲長帶雨草樹不知春  
細水淘沙骨驚飈轉路塵今朝見烽火白首太平人

鄜州懷聶之美

何言內外家憂患兩如麻別淚行三歲思心各一涯  
海邊昏霧雨塞外慘風沙安得雲飛術乘空去不遐

和張推官同年師夷春陰無緒偶成

澹泊輕雲寒不收  
未成春雨只添愁  
風煙寂寞幾何限  
盡入憑高一寸眸

薄寒未去臘纔過  
春色先知在綠波  
不是宿雲能作思  
大都王祭自情多

春曉

鐘漏初傳曉  
滿窗風雨寒  
東岡行可種  
歌枕不成安

鷺鷥

清閑自合無憂累  
白髮何因更颯然  
遙望孤飛下秋水  
雪花一片落晴天

待詔 二首

京洛風塵裏相逢眼盡青  
故人多密近誰誦四隅銘  
待詔久公車囊裝半已虛  
雄文雖雅麗未得似相如

觀僧室畫山水

畫精禪室冷方暑  
久徘徊不盡林端雪  
長青石上苔  
心閑對巖岫目淨失塵埃  
坐久清風至疑從翠澗來

贈外兄吳之才挺

何須親始重友分固非疎况復羈孤極同經憂患餘晚  
成應大器先得類凡魚遊行陪嚴忌聲華誦子虛蒲輪  
詔枚叔馬馬寵相如莫忘西都日寒牕夜讀書

九日懷聶之美

時余在河南  
聶在陳州

錢塘江裏扁舟上別後籬花幾度黃憂患縈心何繚繞  
風光滿目盡淒涼誰同鑿落盃中酒獨繫茱萸肘後囊  
可復無書道情素雲間空有鴈南翔

太室橫山蔽十里相思空復上高臺甕頭白酒行當熟  
籬下黃花稍復開陶令不無同醉興孟君况有解嘲才  
欲憑西北高風勢飛度轅轅勸一盃

飲吳之才家

京洛相逢設主人富家鼎食不如貧解衣換酒同為樂  
知是交情百倍親

晚秋洛中思歸東園

不利不名空去國鴈飛葉落未歸來秋風肯待主人至



籬下黃花隨意開

普明寺荷塘上置酒

菡萏飄零水寂寥  
敗荷疎柳共蕭條  
煙斜雨細愁無限  
醇酒千分不易消

送孟仲習宜君令

翺

合抱生毫末無為厭小官  
政成心更逸道勝意常寬  
野迥山形秀雲疎雪意闌  
離盃如不盡何用禦祁寒

雪霽登普賢閣

積雪明朝日山河坐可分  
蘄巖初解凍片段未歸雲  
閣望窮人境高尋俯鴈羣  
開門枝鳥散玉絮墮紛紛

和陳殿丞芍藥

化工餘巧惜春殘更發濃  
芳繼牡丹檀點藏心殷勝  
纈異香迎鼻酷如蘭瓊樓  
窈窕仙家宅雲葉低垂醉  
裏冠緞子樓子冠子醉  
西施皆芍藥名品自有殊功存藥錄  
不當獨取鄭詩看

到任明年旨罷官有作

恬然如一夢分竹守長安  
去日冰猶壯歸時花未闌  
風

光經目少惠爰及民難可惜終南色臨行子細看

和景文議交絕句

邇來友義漸隳頽直諒多聞貴不回勢利相交何足道  
已知餘耳愧陳雷

傳家集卷六

欽定四庫全書薈要卷一萬四千六百十五

集部

傅家集卷七

宋 司馬光 撰

律詩二

歸田詩

同年張周輔嘗語及仕宦之多端因稱仲長子有言使  
吾有良田美宅背山臨流適意極樂誠無事於此慨然  
感之作歸田詩五章

秋水風波大嗟嗟未可遊漁樵自應樂珪組為誰憂直

木知先伐明珠忌暗投果然鈎可曲不惜取封侯  
紱冕誠虛噐簪裳悉畏塗觸機身未保好直道先孤甌  
石曾何有田園浪更無可能推兩耜沮溺共為徒

聖哲雖云遠遺文章未亡沈冥觀禮樂髣髴見虞黃雞  
黍延三逕琴書樂一堂逍遙名教內富貴亦微茫

松菊陶潛宅蓬蒿仲蔚家行遊筇杖瘦嘯傲幅巾斜屋  
小踈茅覆門深亂柳遮村童迎客至竹簟掃桃花

桑柘綠無際田間戴勝飛清醪迎社熟鳴雉向春肥執

未時將急銜盃日漸稀  
四鄰能共樂招飲莫相違

詠史三首

不事王侯者翛然  
鄭子真開田谷口  
美荷鍾白渠春德  
化移鄉曲聲光動  
搢紳一時鍾鼎貴  
磨滅彼何人

延陵腰利劔上國使  
初通待我周遊徧  
逢君遣奠終晶  
熒繫高樹蕭瑟動  
寒風誰敢欺  
生死蒼蒼照爾衷

春風三閣上珠翠  
日紛紛樂飲陶江月  
清歌過海雲  
醉中失陳國夢裏入  
隋軍玉樹庭花曲  
淒涼不可聞

秋夜望月

萬里氛昏歇金波秋更明星連河渚閣風繞桂枝生  
鵲臨華館新豐落故城古今佳賞盡殊自有餘清

漢宮詞

苜蓿花猶短葡萄葉未齊更衣過柏谷走馬宿棠梨  
逆旅聊懷壘田間共鬪雞猶思飲雲露高舉出虹蜺

讀漢武帝紀

方士陳僊術飄飄意不疑雲浮仲山鼎風降壽宮祠上



藥行當就殊庭庶可期蓬萊何日返五利不吾欺

詠寒士

洋洋泌水側蓬室苦蕭條衣薄難勝夜厨閑空過朝笑  
談東郭履歌誦買臣樵但問才何似無疑卿相遙

野廟

古廟崩椽在墻間雜樹荒依稀設餘像寂寞闕祠堂舊  
日牲豶地今晨狐兔鄉英靈如未滅何以度淒涼

呂祿廟

赤帝祚四百徒然諸呂謀出遊逢友賣未返見家收弊  
冢昔無託遺祠今幸留士心俱左袒何怨曲周侯

梅花三首

從與夫君別寒花幾度春坐愁芳樹老况乃鑑中人  
塞北為君戍江南是妾家遙知關外雪止似嶺頭花  
驛使何時發憑君寄一枝隴頭人不識空向笛中吹

雲際亭

高齋杳冥際迥與世塵違席上山河近天邊桑柘微人

間已飄灑棟裏始紛霏草樹收殘照道遙久未歸

和孫器之清風樓

賢侯宴枚馬歌鼓事繁華晚吹來千里清商落萬家平  
原轉踈雨遠樹隔殘霞宋玉雖能賦還須念景差

先春亭

園林近鈴閣旦夕被仁風自得芳菲早豈將踈遠同冰  
開半塘綠雨借數枝紅會待韶光徧還應到野叢

沈陰欲雪與同列會飲南齋

簿領日沈迷從容樂事稀  
賓朋幸相值樽酒不須違  
慘澹愁雲積參差遠樹微  
淹留勿輕散待取雪花飛

五哀詩 并序

孔子惡利口之覆邦家者甚矣讒之為害不可一二數也  
聊觀戰國以來楚之屈原趙之李牧漢之晁錯馬援齊之斛律光皆負不世之才竭忠於上然卒困於讒不能自脫流亡不得其所而死或者國隨以丘墟此其尤可大哀者也因即其事作五哀詩且以警後世云

屈平

白玉徒為潔幽蘭未謂芳窮羞事令尹疎不忘懷王寃  
骨消寒渚忠魂失舊鄉空餘楚辭在猶與日爭光

李牧

椎牛饗壯士拔距養奇材虜帳方驚避秦金已闔來旌  
旗移幕府荆棘蔓叢臺部曲依稀在猶能話郭開

晁大夫

人主恩猶盛讒夫弄舌端旋聞就斧質不得解衣冠反

虜齒纔冷謀臣心盡寒晁宗噍類盡漢室泰山安

馬伏波

漢令班南海蠻兵避鬱林天涯柱分界徼外貢輸金坐  
失姦臣意誰明報國心一棺忠勇骨漂泊瘴烟深

斛律丞相

君臣日荒宴歌舞諱言愁老相猶當國強鄰不敢謀謠  
言雖未出姦謗已先流誰察忠臣意通宵抱膝憂

遣興

京洛紅塵裏閉門常獨居雖無守道愧終與趣時疎文  
舉徒飛表曹丘懶挾書誰憐從宦久不及策名初待免  
謀真拙屠龍藝亦虛何當治歸計松菊統吾廬

閹吏

弊車羸馬犯塵泥愁到朱門徧徧辭相國舍人難驟見  
將軍馬監豈相知因循歲月勞何補顛倒風埃辱固宜  
惆悵東岡舊陂在素心空負白雲期

山家

林下脫雙履  
牕邊挂幅巾  
閑堂風掩戶  
斷嶺月窺人

風

隴首紅旌急  
罇前翠幕重  
林端翻遠刹  
花外轉疎鐘  
夜寂清機發  
春闌別意濃  
如何玉琴韻  
併欲在青松

金山寺

香刹冠差峩  
松門絡薜蘿  
風清塵不到  
岸濶鳥難過  
欲雨江聲怒  
新晴海氣多  
行舟未搖棹  
回首隔烟波

出塞



邊草荒無路星河秋夜明卷旗遮遠塞歇馬受降城霜  
重征衣薄風高戰鼓鳴將軍功未厭士卒不須生

古松

摧頽巖壑間磊落得天頑香葉低漸水餘根倒挂山白  
猿窺子落黃鶴認巢還不久應為石莓苔舊已班

故絳城

文公恢霸略征討轉周衰奕世為盟主諸侯聽會期山  
河表裡在朝市古今移欲訪祁麓處鄉人亦不知

塞上四首

節物正防秋關山落葉稠  
霜風壯金鼓霧氣濕旌裘  
未得西羌滅終為大漢羞  
慙非班定遠棄筆取封侯

鴻鴈秋先到牛羊夕未還  
旌旗遙背水亭堠遠依山  
落日銜西塞陰烟澹北關  
何時獻戎捷鞍甲一朝閑

瀚海秋風至蕭蕭木葉飛  
如何逢漢使猶未寄征衣  
不歎千里遠難甘一信稀  
年年沙漠鴈隨意得南歸

劔客蒼鷹隊將軍白虎牙  
分兵邏圓水縱騎獵鳴沙  
浪

有書藏袖難憑信，連家不堪聞曉角。吹盡落梅花。

黃柑

黃金綴縹蒂，搖落楚江涯。采助杯盤勝，羞將橘柚偕。時移香不變，物遠味尤佳。欲種滄洲樹，何年此意諧。

晉陽三月未有春色

天心均煦嫗，物態異芬芳。上國花應爛，邊城柳未黃。清  
明空改火，元已漫浮觴。仍說秋寒早，年年八月霜。

柳溪對雪

春風不勝雪散漫度龍沙密映緣谿柳爭飛亂眼花  
夷賒美酒油壁繫輕車塞下芳菲晚聊將當物華

酪羹

軍厨重羊酪饗士舊風傳不數紫萸滑徒誇素鮪鮮  
燻蠹煩桐取勺藥助烹煎莫與吳兒說還今笑茂先

奉同道矩謝始平公惠硯

爵臺今已傾飄瓦出蕪城還入縑紉用尤資筆墨精  
相君憐古物內史擅書名聊用飛軍檄何愁楯鼻平

陪始平公燕柳谿

谿光不動柳風輕  
玉帳森沈擁萬兵  
鷗入煙中閑自舞  
魚翻波面喜相迎  
樓船下視晴天碧  
鼓吹前驅遠陌清  
桃李歸時應盛發  
薰然和氣滿春城

到并州已復數月率爾成詩

忽忽此何地  
經時更自猜  
深疑醉裏得  
復似夢中來  
薄宦真何益  
浮生信可咍  
鵬蜩定有分  
不若寸心灰  
和道矩送客汾西村  
舍杏花盛開置酒其下

田家繁杏壓枝紅，遠勝桃夭與李穠。  
何事偏宜閑處植，無端復向別時逢。  
林間暫繫黃金勒，花下聊飛碼碯鍾。  
會待重來醉嘉樹，只愁風雨不相容。

北軒老杏其大十圍，春色向晚止開一花，予憫其憔悴，作詩嘲之。

春木爭秀發，嗟君獨不材。  
須慙一花少，強逐衆芳開。  
頑艷人誰采，微香蝶不來。  
直為無用物，空爾費栽培。

杏解嘲

造物本非我榮枯那足言但餘良榦在何必艷花繁壯  
麗華林苑歡娛梓澤園芳菲如可采豈得侍君軒

寄陝西提刑江學士

明主矜庶獄選才從本朝鄴侯三尺律漢使一封軺郡  
國清名滿關河古意饒淒涼乘障客華髮日蕭蕭

從始平公城西大閱

滄溟浴日照春臺組練光中玉帳開汾水騰凌金鼓震  
西山宛轉旆旌迴逍遙靜散晴空雨叱咤橫飛迥野雷

坐鎮四夷真漢相  
武侯空復道英才

陪諸君北園樂飲

浩歌縱飲任天機  
莫使歡娛與性違  
玉枕醉人從獨卧  
金羈倦客聽先歸  
須知會府閑時少  
况復邊城樂事稀  
花卉正濃風日好  
今年已不負春暉

和道矩紅梨花二首

繁枝細葉互低昂  
香敵醪醕艷海棠  
應為窮邊太寥落  
併將春色付穠芳



蜀江新錦濯朝陽  
楚國纖腰傅薄粧  
何事白花零落早  
同時不敢鬪芬芳

和懋賢聞道矩小園置酒助以酒果副之以詩  
芙蓉幕下惜餘閑  
不使芳華取次殘  
珍果醇醪與新句  
併將佳味助清歡

數日不至後圃今晚偶來芳物都盡率然成詩  
爛熳不解賞飄零  
空慘悽殘紅正滿地  
不忍踏芳蹊  
和樂道自河外南轅過  
宜芳雨晴和氣景物可

愛馬上偶成

京洛春應老河邊  
初解顏碧浮煙際  
草翠滴雨餘山目  
極塞帷外詩成攬轡間  
滿川桃李色共喜傳車還

夏日

窮邊已深夏氣色  
耿清秋鮮旭開山郭  
涼煙澹戍樓  
曉鈴烽火息區脫  
塞塵收迨此軍中暇  
無妨文雅遊

晨發故關寄逢古

畫戟衣中趨絳帳  
驛亭門外拂征鞍  
已嗟漂泊三年別

更負從容十日歡  
煖席未窮談  
笑樂陟岡相望  
滯留難揚鞭策馬幾多意  
原上秋風作晚寒

中秋夜始平公命與考較諸君置酒賦詩

月華秋色兩鮮新  
萬里澄空不受塵  
兔濯素毛騰浩露  
桂飄香實下飛輪  
光侵酒面寒無力  
清入詩毫健有神  
坐客何須辭醉倒  
相君應不惜車茵

病酒呈晉州李八丈

身如五嶺炎蒸裏  
心似三江高浪中  
誰道醉鄉風土好

舟車常願不相通

和李八丈小雪同會有懷鄰幾

天祿淹回德齒尊  
蹇留汾曲兩朱轡  
閑軒坐嘯正飛雪  
同舍倦游來及門  
空嘆高歌如郢客  
媿無佳賦似文園  
坐中猶欠鄰幾在  
深負棊枰與酒罇

三月晦日登豐州故城

春盡蕪城天一涯  
白榆生莢柳生花  
滿川戰骨知誰罪  
深屬來人戒覆車

寄聶之美

之美時監  
韶州錢監

去歲雙毛白今春一齒零人生浮似葉客宦泛如萍塞  
上貂裘弊天涯海氣腥何當占箕頰蕭散並柴扃

又寄

心目悠悠逐去鴻別來容易四秋風莫嗟密密書連紙  
萬里經年信一通

和錢學士

公輔字  
君倚

呈邵興宗

霜露蒼蒼宰樹高累茵列鼎重鴻毛蕪葭自幸猶依玉

髀髀何能學奏刀才薄無由裨覆載命竒不得報劬勞

光仕始周歲  
二親繼喪

平生念此心先亂蓼蓼難分義與蒿

曉思

東帶朝尚早蓬門未脫扃短籬潛落月老樹帶孤星  
隱几貂裘黑開編竹簡青子雲非執戟何以得窮經

錢君倚示詩有歸吳之興為詩三十二韻以贈

吳越為君土峭函是我家濯纓從吏事傾蓋聚京華奕

世交朋重

二先君景德二  
年同年進士

同僚分誼加

光與君倚崇文  
吏部開封皆同

官聲光嘗耳剽臭味辱肩差選士叅縣石烝髦應椽置

帝畿圍日月蓬堵積煙霞咨訪傾肝膽推褒借齒牙後

來慙瓦礫旁倚媿蒹葭談論寥天一詎諧老柏槎虛舟

坦莫逆璞玉瑩無瑕信美陪遊行胡為起咄嗟勞歌盡

鄉思旅夢各天涯誠厭簪紳累難堪獄訟譁銛筦朝插

蝟貫索莫如麻霖霖霑朝服蜩蟬沸尹衙宿姦牢窟宅

弊俗費鞭撻鯨鱣思吹絮

吳中食鯨魚鱣以楊花為候

羊羨憶卧沙

關中羹羊有卧沙細肋  
梅林連雨熟梨味得霜佳秋色城臨水春

風路入花稻肥初斷蟹

斷蟹事見笠澤叢書

桑密不通鷓

秦人謂桑密有

鷓飛不過之語

不蹙衄浮盤芡鈎聯卧壠瓜江蓴半卷葉石蕨乍

舒芽風物隨鄉樂山川苦道遐若人才有裕修己德無邪正恐臨醜髀安能捨鎔鄒怒飛期寢逼肥遯迹猶賒不比溝中木微同井底蛙果能真引去誰復強邀遮旋結蝸牛舍還乘下澤車閉門常反拒醉幘任歌斜林野遊如鹿泥塗蟄似蛇故人時記憶陽羨致新茶

喜張聖民得登州



盡日少閑暇中宵夢亦勞符移空浩浩榜楚鎮警警敢  
說今求郡翻思昔坐曹羨君乘五馬東去一何高

詩寄雲夫處士老兄兼呈知府待制八丈

一鷄曾飛奏中林下鶴書今乘使君馬重到逸人居松  
竹過從久閭閻惠愛餘只應棠樹影比舊更扶疎

和任屯田

迥字元道

感舊叙懷

結交英俊樂如何風誼敦明寄詠歌自致青雲今有幾  
化為異物已居多積中本自沽良價毫末安能滑至和

鄰笛不堪頻嘆息酒壚那得重輕過年華易度牕塵影  
人事難期海水波賢業著鞭猶可任况君壯齒未蹉跎

次韻和冲卿中秋朧月

豈無錦幄翠簾垂匝樹明燈正赫曦共惜日華方滿夜  
更當秋色中分時烏皮几穩風侵鬢白玉樓高冷透肌  
千里浮雲何處斷北來試問鴈應知

次韻和鄰幾秋雨十六韻

氣象殊朝夕興居錯晦明混元初不宰靈雨浩無程蟄

隘寧天意咨嗟固物情  
曠盥方有望蒼蔚已隨生  
杲杲升還隱淒淒斷復行  
亂莎長被徑荒蘚綠緣  
甕轍迹康莊絕潢汙壟  
畝平茅茨不足庇禾黍  
若為成蟋蟀頽墻泣蚍  
蜥壞竈盈乘時衆鷗舞  
得意怒蛙鳴牛馬誰分  
異蕭蘭已混并居閑猶  
叵度負重况遐征舟泊  
川無渚輪摧路有阬輟  
羨愁病婦煬竈擁寒嬰  
災不妨明德神應格至  
誠溥光終下燭時藿久  
心傾

和始平公郡齋偶書二首

文武從容兩有餘  
公槐將幕往來居  
已安四海如三傑  
欲散千金比二踈  
今日監邊親跪轂  
他年入殿賜乘車  
武侯暫為蒼生起  
長憶隆中卧舊廬

平安候火出雲間  
區脫無塵刁斗閑  
漢相威聲驚遠塞  
敵兵遁迹夜開關  
赤松雅意思輕舉  
黃閣羣心望復還  
玉帳牙旗空壯觀  
謝公高興在東山

春獵

小苑微寒春鴈飛  
石關宮外草萋萋  
漢家旌旆連圍合

秦國山川入望低  
花色纔臨珠綴發  
柳陰欲傍金隄齋  
韓嫣承恩來視獸  
飛塵遙出建章西

柳枝詞十三首

煙滿上林春未歸  
三三兩兩雪花飛  
柳條別得東皇意  
映隄拂水已依依

依依高樹出宮牆  
搖曳青絲百丈長  
願與宣溫萬年樹  
年年歲歲奉君王

君王遊豫賞青春  
折柳為卷賜侍臣  
莫怪長條低拂地

只緣供掃屬車塵

屬車隱隱遠如雷  
陳后愁眉久不開  
楊花都知人意  
故入長門宮裏來

長門宮曉未成粧  
結雨縈風蔽瑣牕  
莫令透入華梁燕  
那堪負汝更雙雙

雙雙春燕颺雲霄  
楚國宮深樂事饒  
會待急管繁絃際  
試取織條並舞腰

舞腰繽紛長樂東  
柳間悵飲送春風  
請君試望邯鄲道

青門裊裊徹新豐

新豐道上灞陵頭  
又送夫君去遠遊  
借問柳枝能寄否  
古今共有幾多愁

多愁尤是別離深  
折條相贈各沾襟  
留住不住居人意  
欲去未去行人心

行人白馬去遙遙  
初上金隄欲過橋  
望塵不見遮人眼  
苦怨無情萬萬條

五柳先生門乍開  
宅邊植杖久徘徊  
陌頭遙認顏光祿

詰旦先乘瘦馬來

白雪雖然比絮花  
艷陽不得共繁華  
為君故入烏衣巷  
飛舞風流謝傅家

宣陽門前三月初  
家家楊柳綠  
歲烏歡似白花飄蕩去  
忍能棄擲博山爐

上郡南三十里有相思亭在太山之麓二水所  
交平臯之上往來者徒習其名莫詳其義慶  
歷甲申歲余適延安過於其下于時夏虜梗



邊征戍未息竊感東山采薇之義叙其情而  
愍其勞因作五詩庶幾不違周公之指且以

釋亭之名爾

慶曆四年作

嶺上雙流水猶知會合時行人過於此那得不相思  
偃蹇登陬阪高侵雲日間幾人征戍客跋馬望家山  
塞上春寒在東風雪滿鬚河陽機上婦知我苦辛無  
柳似妖饒舞花如爛熳粧那堪隴頭水嗚咽斷人腸  
空外遊絲轉飄揚似妾心別來今幾日髣髴近雕陰

友人楚孟德過余縱言及神仙余謂之無孟德謂之有伊人也非誕妄者蓋有以知之矣然余俗士終疑之故作遊仙曲五章以佐戲笑云

神仙謂無還似有秦漢可怜空白首會須一躡青雲梯  
與子同祛千古疑

仙術有無終未知眼看白髮亂如絲何時得接浮丘袂  
滄海橫飛萬里餘

若士北遊窮地角還食蛤蜊養龜殼盧敖尸骨不能飛

今朝九垓何處期

仙家不似人間歡  
瑤漿琅菜青玉盤  
乘醉東遊憇陽谷  
酒瓢閑掛扶桑木

拖師知子能操舟  
穩過茫茫滄海流  
白浪駕天千萬里  
直令挂骨長鯨齒

武成致齋奉酌吳冲卿寺丞太學宿直見寄二

首

廣文更直太常齋  
咫尺無從盡素懷  
不及清風得隨意

夜深容易過天街

雪後餘冰尚綴簷  
月華霜氣入疎簾  
難堪瓊玉驚心骨  
坐覺清寒幾倍添

雪中尋友不遇

擁袖犯風雪  
驅車行詣誰  
朱門不可入  
素友復難期  
依世誠多拙  
迷方忽自悲  
褊心終寡合  
吾道易參差

河邊曉望

高浪崩奔捲白沙  
悠悠極望入天涯  
誰能脫落塵中意

乘興東遊坐石槎

早春寄東郡舊同僚

樓臺帶餘雪寒色未全收  
久負入關意空為同舍羞

關

傅家集卷七


謹案卷六第二十四頁後六行纈子樓子冠子醉  
西施刊本冠訛凡今據羣芳譜改

卷七第八頁後四行五行蠟蟲煩桐取按揚雄長  
楊賦有燒燭蟲之句詩蓋用此附識之

第十一頁後三行目極褰帷外刊本褰訛寒今改  
第十四頁前一行烝髦應椽置刊本置訛置今改







總校官庶吉士臣侍朝

校對官編修臣朱攸

校對官監丞臣張魯炳

謄錄監生臣劉復善

謄錄監生臣陳燦

欽定四庫全書薈要

集部  
傳家集卷八

詳校官助教臣常循



欽定四庫全書薈要卷一萬四千六百十六

集部

傳家集卷八

宋 司馬光 撰

律詩三

感興寄聶之義

平生百無可強為一官縻世味偏予薄心期獨子知  
林猿愁玉瑣樵馬患金羈年事今華髮求榮欲為誰

和江鄰幾金鈴菊

何處見佳菊秋風汶水陽酒浮金鐸細露泛密房香不

謂紅塵地相逢君子堂依然  
故人意不減舊芬芳

寄清逸魏處士

鄉樹三搖落臨風歌式微  
徒嗟俗緣重端使素心違  
茅閣杉松冷山園藥草肥  
不能如海燕歲歲一西飛

贈清行

我厭俗緣苦空為薄宦牽  
如師真達者於世亦超然  
敝笠衝塵陌寒雲擁雪天  
崎嶇遠相顧深媿此心專

夢穉子

窮泉織骨已成塵幽香閑花二十春昔日相逢猶是夢  
今宵夢裏更非真

二月二十四日館宿興宗舍後桃花盛開偶書

牖上

金馬春寂寂穠桃隨意開夕風零落盡不待主人來

二月三十日與同舍宴李氏園晚歸馬上賦詩

得歸字

門前蹀躞金羈滿坐上連翩玉罕飛數尺遊絲留客醉

一行垂柳送人歸  
同邀勝友時難得  
重到名園花已稀  
莫惜芳辰賸行樂  
無端風雨橫相違

和宋次道西都元日懷不疑并見寄

露冕優分竹題輿  
佐畫忻比年攜手樂  
茲日賞心違齋祀  
春來併娛遊別後稀  
誰憐從窶卒草際  
犯寒歸

酬次道板橋見寄

春來曾約醉河橋  
深負垂楊千萬條  
今日都門相望處  
西風亂葉正蕭蕭

雙井茶寄范景仁

春睡無端巧逐人  
驅訶不去苦相親  
欲憑洪井真茶力  
試遣刀圭報谷神

正月二十四日夜雪

疊瓦浮輕雪  
參差粉畫難  
苦欺初變柳  
故壓未生蘭  
夜色微分白  
春容不受寒  
即為花卉奪  
猶得整供看

酬不疑雪中書懷見寄校理邵必

直道免三黜  
敢云羞小官  
盤餐紅粟澁  
衣桁墨貂寒  
盡

府容身物侯門曲意難荆扉盈尺雪有客問袁安

答師道對雪見寄

直講陳洙

陰風一夕驚曉雪滿都城氣復千家白光連萬象清戀  
空飛不下弄態舞相縈歷亂看無定飄颻轉未成綴垣  
時缺剝壓竹乍歌傾細隙過無滯寒窗拂有聲園林洵  
結練觀閣巧彫瓊草木情先喜乾坤意亦榮營魂頓疎  
健病目蹙虛明郢曲高誰和羞將瓦缶鳴

苦雨



積雪欲侵旬朝晡漫不分蒼涼微露日慘澹已生雲地  
半成泥滓天應散垢氛時聞度鶴鵠空外自為羣

酬師道雪夜見寄

玉樹交橫雪後天銀河沈著斗欄干筆鋒微結冰絲澁  
燈暈初成花燼殘太學先生羶苦薄公車倦客履仍單  
欲吟佳句到清曉夜寂愁聞金石寒

昌言有詠石髮詩三章模寫精楷殆難復加僕  
雖未覩茲物而已若識之久者輒復強為三

詩以繼其後非敢庶幾肩差適足為前詩之

輿臺耳

校理石揚休

萬古風濤浸石巖老苔垂足細鬢髮傳聞海底珠無數  
何事從來散不簪

金闕銀城仙客居欲傳消息問麻姑蓬萊無物堪為信  
剪寄蒼龍一握鬚

琅菜來從若木邊

西王母傳有碧海之琅菜

非膏非沐綠窵延玉盤

委積羞嘉客不是陶家無饌錢

錢子高有徐浩詩碑石昌言借摹其文甫及數

本石有微釁懼而歸之子高答簡有碎珊瑚

之戲昌言以詩贈子高同舍皆和司諫錢彦遠

徐公精筆老生神石刻猶能妙奪真幾為通書翻喪寶

愈令好事惜傳人鋒鋌半折猶能健圭璧微瑕自足珍

直使盡隨如意碎石家玉樹未全貧昌言家圖書所收最多

又和雪霽

南宮來幾時挾纊易春衣意謂花將晚何言雪尚飛夜

聲通旅枕曉色弄晴暉繼日勞王事離離鴈已歸

又和二月五日夜風雪

春風正豪怒夜雪復飄揚勿使羈愁亂自知清興長  
簾疎聲浙瀝燈冷暈微茫此夕牛衣客成名不可忘

喜范景仁直秘閣

延閣屹中天積書雲漢連神宗重其選國士此為偏夫  
子岷嶠秀聲名俊造先清標峻不極勝氣馱無前待價  
猶懷壁臨岐首著鞭介推不求顯張季以方遷玉檻鈞

陳上丹梯北斗邊帝容瞻日角

閣有太宗聖容

宸翰照星躔職

秩曾無貴光華在得賢公卿殊未晚尚少買臣年

和伯鎮再入館

甘泉獻賦人流落浙江濱日嘆三年謫歸來萬事新銓  
衡時進對戶牖日相親明主方思賈非徒問鬼神

雙竹詩

上苑通丹禁修林繞玉堂周阿紆鏤檻並榦擢新篁蕭  
灑駢瑤甃連翩拂壁璫虬騰雙角直鯨噴兩鬚長曉泊

煙華重晴留雨氣涼分音成律呂齊秀待鸞凰碧借雲  
霞潤清依日月光物情知有謂天造固無方比節羣誠  
合虛心至道彰吾君愈勤德不敢有嘉祥

秦人

楚旗獵獵蓋山紅回首咸陽一炬空惆悵秦人虛用意  
幾年辛苦得山東

山頭春色

天意欲廻煦羣生稍鬱蒸平田猶未徧絕嶺獨先升翠

色添崖柏寒聲折澗冰誰為物外友挈手共同登

和子淵除夜

緹室重飛玉琯灰物華全與斗杓回依依殘臘無情別  
歷歷新春滿眼來強取酒卮浮翠柏懶開粽葉覓楊梅  
男兒努力平生志肯使功名落草萊

和子淵元夕

神嶽嶢峽闕角齊銀蟾無影玉繩低風傳絲管交加發  
燈滉星河上下迷清醴橫飛金鑿落香塵不染錦障泥

誰知此夕齋祠客近在宮城槐柳西

冬夜

冬夜何其永寒光四次寥鴈橫星歷歷人靜漏迢迢破  
屋霜應重荒庭雪未消不眠何所念達曉思無憊

答劉遵父謝龐公惠炭

東郭先生履半穿禦冬深愧主人賢應憐道上雪欲積  
意使爐中灰復然麩蘖暗添寒酒力圖書共免濕薪煙  
茅齋斗似饒光彩客至何憂臘後天



興宗許菊久之未得

邵元

菊栽許送定如何庭下不堪秋草多  
九日無花更無酒便攜藜杖直相過

得菊栽并詩

黃花小墜和煙劓野興蕭蕭已相逐  
同來更得蕪詩句久立看詩忘栽菊

和同舍對菊無酒

黃花倚秋色曄曄為誰開更使窺  
殘榼空冷洗舊杯嗅

香行繚繞撚藥立徘徊盡日柴門外白衣來不來

聶之美訪及不獲展奉以詩為謝

昔君來闕下定館必吾廬今日雖相值依然是索居

之美

僧館於舍不堪休沐少便使往來疎深愧原思巷空迴長者

車

題闕

長嘯蘇門石行藏世莫知道遙心迹遠寂寞姓名誰鄉  
在無何有時方不可為麒麟本神物安得係而羈

和冲卿喜雨偶成

萬里風隨快雨來，塵昏消伏早光開。  
物情濯熱參差喜，天意為仁容易迴。  
簾映薄寒燈有暈，牕含虛白麝成煤。  
君侯雅有江湖興，蕭灑何須氣象催。

寄贈致仕劉都官

諷張元常云諷年六十二致仕夫婦皆徙居簡州賴山中

有二子皆官其一登進士第孫皆好書

星郎年未至辭祿一何高，目瑩棲靈氣眉疎出秀毫。  
胸中自有樂身外，盡徒勞回首紅塵地紛紛笑我曹。

解紱沱江外誅茅井絡邊老萊夫婦隱韋孟子孫賢浮  
蟻邀旁舍蹲鴟種薄田不須親几杖想望已蕭然

范景仁詩云移家尚恐青雲淺隱几唯知白日長  
朱公綽詩云疏草焚來應見史橐金散盡只留書

和吳省副

中復字仲庶

梅花半開招憑由張司封

玉伯

字公  
達飲

帝鄉春色嶺頭梅高壓年華犯雪開正與嘉賓思共醉  
不須芳物重相催從車貯酒傳呼出側弁簪花倒載迴  
風雨難期王事劇未知休沐幾旬來

依韻和仲庶省壁畫山水

畫工執筆已心遊稍稍蘅皋引杜洲  
堆案煩文猶倦暑  
滿軒新意忽驚秋天生賢者非無謂  
官遇明時未易休  
正恐怒飛朝暮事丹青難得久淹留

太博同年葉兄紓以詩及建茶為貺家有蜀牋  
二軸輒敢繫詩二章獻於左右亦投桃報李  
之意也

關山草木未全春  
破額真茶采撷新  
雅意不忘同臭味

先分疇昔桂堂人

西來萬里浣花牋舒卷雲霞照手鮮書笥久藏無可稱  
願投詩客助新編

秋夕不寐呈諫長樂道龍圖

雨氣生煙暈霜寒入漏聲疎籬過螢影腐葉掩蟲鳴丘  
壑違初願簪裾徇外榮丹心終夜苦白髮詰朝生恩與  
乾坤大身如草木輕何階致明主垂拱視昇平

始平公以光得免使北賜之以詩謹依韻酬和

皇華將命得人難專對非才輒自言  
幸免驅車涉沙漠  
尚容載筆侍宣溫不唯羞屈穹廬膝  
無奈常遊魏闕魂  
袞職區區未能補何時餘論奉清樽

孟嘗

冠蓋盈門意氣豪海魚兼雨未充庖  
歸來散盡三千客  
方悟時人市道交

喜李郎郎東之得西京留臺

賤子何為者栖栖今二毛  
滄波浮片葉大塊載秋毫  
利

物物何補營身身已勞羨君遺世網脫屣一何高

始平公新作雙樗庵命光為詩

間氣生王佐多才秉國鈞棟隆憑杞梓節勁仰松筠底  
績承平業遺榮壽考身結廬依散木退讓樂天真

忝職諫垣日負憂畏緬思雲夫處士老兄蕭然

物外何樂如之因成浮槎詩寄獻以抒鄙懷

秋水浮槎客漂如一葉輕鷗羣須伏信鯨口幾忘生耿  
耿天津澗洶洶海浪驚何時還故土懷糈問平君



奉和何濟川代書三十韻寄諸同舍

金馬延羣儁芸香聚衆書  
杳疑神境絕深與世塵疎  
氣逼煙霄爽光分日月餘  
不才叨誤選故友幸聯居  
雲蓋森朝騎天閣謹契魚  
後先陪賈馬左右揖嚴徐  
朱閣霜清外璇題日上初  
辭林精采擷藝圃縱遊漁  
決勝楸枰瞋窮歡綺席舒  
朝昏升紫闥咫尺待雕輿  
玉壘俄鄉思銅符忽詔除  
綵衣承几杖華轂照園廬  
四郭柑垂蔭千塍稻散渠  
壺漿迎露冕鏡吹擁高旂  
有德能仁虎無欺

恥怒狙道塗繁揖讓犴獄絕淪胥滯穗棲場圃鳴桴靜

里閭貧寧費官燭飢不茹家蔬翁子懷青綬文園駕赤

車古今相與較勝負定何如上正開宣室人方誦子虛

追鋒行入謁委佩復傳臚撫已聊晞驥臨民遽起予居

然耗廩祿豈不愧簪裙鵠翼顏何厚錐囊意未攄因循

戀糠粃汨沒老塗淤自顧徒為爾誠非益者與俄承呂

公檄遂策阮生驢驛騎傳巴徼詩筒達魯墟琳琅固無

價燕石敢沽諸

和始平公貽一二賓僚

儒冠藹藹從平津東閣由來盛衆賓終始何嘗忘教育  
高卑曾不間疎親共陪樽俎無虛日空喜谿山得主人  
白雪屢歌殊未和自知羞愧後車塵

留客

酒煙漠漠自生春舞袖飄飄拍拍新須信客歸絲竹散  
清風白月解愁人

和始平公長句寄漢州何學士

勢交倏忽易蕭條賴有伊人尚建標須信松筠凌雪茂  
昔為蒲柳望秋凋欽賢高館三年別廣漢專城百舍遙  
書紙如雲詩叩玉數憑疾翼度青霄

何濟川有書見貽云以親老須守遠郡以便祿  
養不得如光在主人幕下因以詩答

千騎駸駸簇畫輦高旌大蓋五驂騶齋中酒美連翩醉  
湖上花繁爛熳遊鷄犬相聞通故里旨甘不絕奉晨羞  
只應朝夕平津閣得向君前立勝籌

二月十一日與二三僚友遊叔禮園亭以詩戲  
呈

下馬久徘徊林芳殊未開春風真有意須待主翁來

十四日小園置茶招宗聖應之皆辭以醉為詩  
贈之

草樹弄春暉家家倒載歸誰憐獨醒客日暝掩雙扉  
同僚有獨遊東園者小詩寄之三首

車馬東城路芬芳數里塵風光不相待愁殺未遊人

咫尺東園樂無如簿領何  
春風連夜惡聞道落花多  
城樓傳晚鼓稍稍訟庭稀  
起拂衣中土還乘款段歸

小詩招僚友晚遊後園二首

五陵年少競春暉肥馬金鞍白玉羈  
何似松間煮新茗  
更來花底覆殘碁

麥田小雨隴微青草樹欣欣照晚晴  
花下客來醒亦好  
猶勝閉戶過清明

小園晚飲

賦得春字

公府豐暇豫真成棄擲春  
招邀俱勝友爛熳醉芳辰  
花艷穠無敵文鋒健有神  
猶勝擁朱墨終日坐埃塵

李花

得韻同前

嘉李繁相倚園林淡泊春  
齊紈翦衣薄吳紵下機新  
色與晴光亂香和露氣勻  
望中皆玉樹環堵不為貧

東牕

臨風梳短髮蕭颯晚涼新  
不識市朝客何如江海人  
沉吟憑几歌側帶紗巾濁  
世事無盡東牕聊放神

奉和始平公酬大資政吳侍郎

道盛經綸業文高翰墨場雍容偃藩地密邇釣璜鄉  
回首紅塵遠清心白日長山形抱城堞谿影照公堂  
粃稭干脰碧芙蓉萬頃香跨波橫畧約遍地亞篔簹大  
埜禾麻溢高齋几席涼夔龍屢賡唱東壁正垂光

晚行夜園見菊戲宜甫

野菊荒無數班班初見花徑須求一醉試遣問東家

野菊



野菊未嘗種秋花何處來  
羞隨衆草沒故犯早霜開  
寒蝶舞不去夜蒼吟更哀  
幽人自移席小摘泛青杯

秋夜

城上調秋角煙間發暝鍾  
風枝搖宿鳥霜草覆寒蒼  
久負觀書樂端愁束帶恭  
整因羣吏散還得遂幽慵

再呈宜甫

西家壺已到次第向東鄰  
朱戶如堅閉黃花惡笑人  
宜甫家有金鈴菊客未之識  
因代菊贈宜甫

主人倦邀客寂寞委蒼苔此日開無益明年不復開

深夜

疎星映戶月流天羣動收聲四寂然嗟爾寒蜚怨何事  
悲吟徹曙亦無眠

奉和始平公喜聞昌言修注

鳳口除書下九閣簪紳拭目仰殊恩曉提麟筆依華蓋  
日就螭坳記聖言桃李新陰方藹藹驂騑老志更軒軒  
主人喜見相如達趣召鄒枚洗玉樽

光與昌言俱出始  
平公門下昌言時

十年五

秋雨蕭條聞宗聖應之飲酒詩呈宜甫

寒風細雨未晴天  
密似輕塵薄似煙  
一室獨吟圖史亂  
四鄰高會綺羅鮮  
鴈飛斜柱絃隨指  
蟹薦新螯酒滿船  
自笑不歌仍不飲  
昏昏只解枕牀眠

宜甫東樓晚飲

賓主俱歡醉高樓  
迥倚空形忘羈檢  
外酒散笑談中晚  
市煙初白秋園葉  
半紅登臨不厭數  
朝夕是寒風

昌言謫官符離有病鶴折翼舟載以行及還修

注始平公以詩問之命光同賦二首

曾下青田啄玉苗  
泥沙病羽久蕭條  
謫仙不欲留塵世  
依舊提攜上碧霄

相閣書傳紫闥深  
破緘先問九臯禽  
不令一物傷天理  
仁愛方知真宰心

和聶之美重遊東郡二首

躍馬津亭未幾何  
宦遊容易十年過  
飄飄空似隨流梗

寂寞猶為挂壁梭  
西嶺應餘當日翠  
南湖真減幾分波

之美云南浦比  
舊水涸過半

輸君尚得飛征蓋  
重向春園聽舊歌

南湖重過正逢春  
官柳雖疎亦解新  
臺榭傾歆賓友散  
臨風愁殺獨遊人

大熱

山澤欲焦枯  
炎光滿太虛  
不知天地外  
暑氣復何如

夷齊

夷齊雙骨已成塵  
獨有清名日日新  
飢死溝中人不識

可憐今古幾何人

龍女祠後塘自生荷花數枝與史誠之更相酬

和

平湖漠漠芰荷稠水國芳春不勝秋空有棹歌人不見  
晚風一曲去悠悠

越女行歌縱棹輕蒼茫別浦晚烟凝荷花折盡不歸去  
澹澹扁舟不易勝

荷底清漣照綺羅長安公子舊情多躊躇不去知君意

重唱吳音白紵歌

賀監家居逸興饒  
枝分鑑水濶容舸  
穿荷宜去邀漁叟  
共醉船頭半榼醪

清江向晚採蓮稀  
獨倚蘭舟久未歸  
目斷何堪人不至  
斜風細雨濕羅衣

素舸朱蓬青竹高  
棹歌風散近還遙  
斜陽借問歸何處  
家住水村郎姓

別殿無人利自芳  
玉階朱檻繞金塘  
館娃寂寞無西子

羞與吳宮競曉粧

贈楚法曹叔度

夫君能直節不恥法曹輕道果因時屈官無當已榮松  
杉雖偃蹇霜霰苦崢嶸會有良工識終觀大器成

寄楊州侯都監仲倫

木落淮南樹秋風日夜高月臨楊子渡雪卷廣陵濤不  
得同蕭散何因破鬱陶空憑尺書速未解夢魂勞

感懷



昨日春冰破水邊今朝臘雪墜風前歲華過目疾飛鳥  
壯志如何不著鞭

之美舉進士寓京師此詩寄之

結髮聲華盛無疑屈未伸何妨久垂翅從此欲驚人鷹  
擊天風壯鵬飛海浪春行當解故褐不惜化京塵

風雨數日不見叔度晚約公明詣之

雲雪連朝閣明從嘆坐違臨文與誰共開卷為君稀趣  
掃六花散聊通一徑微當攜兔園賦同映讀書幃

南榮卮酒罷君返東道居坐作三朝別杳疑千里餘閑  
門嗟雀網深淨怯柴車向晚開簾喜彤雲稍覺疎

贈吳之才

勝冠自立艱難裏大器由來貴晚成松柏倘非生磊落  
巖崖何易出崢嶸蘇秦由困羞妻嫂主父居貧厭弟兄  
六印佗年擁車騎會須重過洛陽城

寒食許昌道中寄幕府諸君

原上煙蕪淡復濃寂寥佳節思無窮竹林近水半邊綠

桃樹連村一片紅  
盡日解鞍山店雨  
晚天回首酒旗風  
遙知幕府清明飲  
應笑馳驅羈旅中

和叔度獨登天臺水亭

郊外靈潭潤新亭  
占曲隄戲魚迎墜絮  
鷺雉出荒蹊綠  
倒楊梢亂光翻芰葉  
齊雨餘纖月偃野迥  
斷雲低水氣常噴薄  
天風助慘悽  
何知塵外境  
近在郡樓西

喜孫器之來自共城

取友不無人  
愛君天性真  
遠尋窮巷宅  
未拂滿衣塵  
主

禮貧尤重交情別更親誰家釀醇酒盡醉準衣巾

和聶之義雁

汲汲復栖栖往來誰與期映雲纔可見入霧杳難追  
羈枕夢初斷寒閨涕已危冥冥遠繒繳愧爾獨知時

送王太祝豫知伊闕

百里謹迎新令賢儒經吏術盡家傳天開嶺阜竦雙闕  
地雜桑麻隘一川錦雉馴飛春陌上雪鳧高去夕嵐邊  
長才久屈君無限所惜斯民受賜偏



傅家集卷八